



« Rehefa tonga ny Fanahy fahamarinana, dia Izy no hitari-dalana anareo amin'ny marina rehetra » (Jo. 16: 13)

Ry Kristianina havana, 50 andro lasa izay no nankalazantsika ny Paka izay fandalovana amin'ny ratsy miaraka amin'i Kristy. Miara-maty amin'i Kristy amin'ny ratsy dia ny fahotana isika ka mitsangana miaraka aminy mandresy ny ratsy ka miditra amin'ny fiainam-baovao maha zanak'Andriamanitra antsika. Namakivaky izany 50 andro izany isika ka tonga amin'ny fankalazana ny pantekôty izao. Pantekôty midika dimampolo andro taorian'ny nitsanganan'i Kristy tamin'ny maty ka nidinan'ny Fanahy Masina tamin'ireo apôstôly izay natahotra ka nijanona tao amin'ny senakla. Niseho tamin'izy ireo matetika i Jesoa nankahery azy ireo ary indrindra fa nampanantena ny fiavian'ny Fanahy Masina. Fanahy mampiombona azy ireo amin'i Kristy ka hahatonga azy ireo ho Kristianina marina tokoa, ho apôstôly hitory ny Vaovao Mahafaly. Jesoa tsy anivon'izy ireo intsony fa ny Fanahy no miombona amin'izy ireo izany hoe izy ireo tonga Kristy velona amin'izao fotoana izao ary izy ireo no Kristy mpiara-belona amin'olona araky ny nohalalinintsika tamin'ny taona lasa. Kristy mpiara-belona amin'olona no mahatonga antsika ho génération mpanorina, génération de bâtisseurs, constructeurs fa tsy mpanapotika. Mpanorina Eglizy Tranon'Andriamanitra sy Eglizy Olona Velona isika ary izany ny pantekôty. Maniry isika amin'izao pantekôty 2018 izao sady fankalazana ny filankevitra pastôraly mba hitondra antsika amin'ny Pantekôty Vaovao ka hanampy antsika hiombona be kokoa ho Olo Araiky ka hanorina ny ETA sy EOY. Manana modely isika izay sady mivavaka ho antsika dia olontsambatra Lucien Botovasoa.

Niara nivavaka ireo apôstôly niandry ny nidinan'ny Fanahy Masina niaraka tamin'i Masina Maria sy tamin'ireo vehivavy masina tao amin'ny senakla. Henontsika amin'ny vakiteny voalohany mitantara

fa ireo izay natahotra taloha dia feno ny Fanahy Masina, ilay Fanahy mpankahery, ilay Fanahy mpanazava, ilay Fanahy mpampiombona, ilay Fanahy mpampihavana, dia nijoro nanambara fa i Kristy no làlam-pamonjena satria Izy no làlana sy fahamarinana ary fiainana, ao Aminy sy miaraka Aminy ary amin'ny alalany no hahafahantsika manorina ny fiainanan maha zanak'Andriamanitra hahazoantsika ny hafaliana lavorary. Ny Fanahy Masina no mahatonga antsika hitoetra ao amin'i Kristy sy itoerany ka hamokatra be sady ho feno hafaliana. Izany no ankalazaintsika amin'izao pantekôty izao ry Kristianina Havana.

Fankalazana ny fahaterahan'ny Eglizy koa ny pantekôty, ny eglizy izay irahina hitory ny vaovao mahafaly, hanompo ny vahoaka, hanasoa ny vahoaka, hanompo fa tsy ho tompoina ary mikatsaka mandrakariva ny hanasoa ny olombelona manontolo ka faly miararaha antsika olo araiky jiaby amin'izao alahady pantekôty izao.

Ho dinihintsika ireo asan'ny fanahy masina eo amintsika hahatonga antsika ho kristianina mpanorina ny Eglizy Olona Velona.

“Feno ny fanahy masina izy ireo ka nijoro ho vavolombelona” araky ny voalaza amin'ny vakiteny voalohany, izany no asan'ny fanahy masina manampy antsika tsy hatahotra intsony. Mila vavolombelona izao andro iainantsika izao maro ny zavatra mikoroso fahana, ny zavatra ratsy aza matetika fa heverina fa mety daholo na ny lainga na ny fitapitaka, izay tsy manao an'izany dia heverina fa tsy normaly nefa izany dia mifanohitra amin'ny maha olona ka ny asan'ny Fanahy Masina mihoatra izany satria sady hanampy antsika hiaina ny maha olona antsika no hahatonga antsika ho Zanak'Andriamanitra izany hoe ho olona feno tanteraka arak any naharian'Andriamanitra antsika. Na ny razantsika aza nahatsapa an'izany raha nilaza fa ny fanahy no maha olona satria ny olona manampanahy no olonkendry izany hoe manaja ny fifandraisana eo anivon'ny fiarahamonina fa tsy manao saim-pantany fotsiny. Manavao antsika ny Fanahy Masina, tsy hoe mamelona ireo soatoavina fotsiny fa noho ny asan'ny Fanahy Masina dia olombaovao isika vokatry ny fitsanganan'i Kristy tamin'ny maty. Izany no antenaintsika vokatry ny fankalazantsika ny pantekôty izao mba ho vavolombelona isika eo amin'ny fiainantsika andavanandro.

Nijoro ho vavolombelona ireo apôstôly ka nampianatra tamin'ny fiteny samihafa, tsy hoe mahay teny maro samihafa izy ireo fa noho ny asan'ny Fanahy Masina dia azon'ny olona tokoa ny nambarany ka nampiova ny fon'ireo nihaino azy ireo. Asan'ny Fanahy Masina ny mampiombona. Izany no niseho tamin'ny andron'ny Pantekôty voalohany. Koa isika raha mitory ny vaovao mahafaly enga anie mba hahatakatra ny fon'ny olona fa indrindra hanova ny fontsika voalohany indrindra sy ireo izay mihaino antsika koa tahaka an'ireo izay naheno ny fampianaran'ny apôstôly hoy indrindra ny tenin'Andriamanitra tao amin'ny vakiteny voalohany : *“Nony tonga ny andro Pantekôty, dia tafavory tao amin'ny trano anankiray ny Apôstôly rehetra, ary tampoka injay nisy feo avy any andanitra toy ny rivotra nifofofofo mafy ka nahenika ny trano nitoerany: sady nisy lela maro mitarehina afo niseho taminy sy nizarazara nipetraka teo amboniny tsirairay avy, ka samy feno ny Fanahy Masina izy rehetra sy niteny tamin'ny fiteny maro samihafa, araka ny nampitenenan'ny Fanahy Masina azy avy.”* Noho ny asan'ny Fanahy Masina dia niombona izy ireo, gaga ireo izay nihaino azy satria naheno tamin'ny fitenin-drazany avy na dia galileana izy ireo. Tsy hoe i Piera nahay ny tenin'izy ireo fa noho ny asan'ny Fanahy Masina dia nazava tamin'ireo mpiaino ny tenin'i Piera. Ny Fanahy Masina dia mampiteny amin'ny teny samihafa izany hoe mampiombona antsika. Io no nofinofy tamin'ny tilikambon'nyabela ny hifankahazo resaka na fiteny, tanteraka izany raha

avelantsika miasa ny Fanahy Masina. Maninona no tsy afaka mihaino ny hafa isika satria noho ny fitiavan-tena dia tsy misy intsony ny mihaino ny hafa. Maro ny écouteurs hitantsika amin'izao fotoana iainantsika izao eny amin'ny sofintsika nefa tsy misy écouter fa ny tenany ny écouterny no henoiny noho izany tsy misy mihaino isika, tsy mifampihaino isika. Rehefa tsy mifampihaino ao amin'ny tokantrano sy ny fianakaviana ary ny fiaraha-monina dia mikorontana ny fiainantsika. Avelao ny Fanahy Masina hiasa ao amintsika, dingana lehibe amin'ny fanorenana izany, raha tiantsika ho taranaka mpanorina isika dia aoka hifampihaino, mihaino ny bitsiky ny Fanahy Masina. Mihaino ny tenin'Andriamanitra isika dia manorina Eglizy Velona isika.

Ny Fanahy Masina dia Fanahy mankahery antsika hiroso lalindalina kokoa eo amin'ny fiainantsika, manafaka ny alahelo hoy i Jesoa, raha misy zavatra mamatopatotra antsika dia entanin'ny Fanahy Masina isika hanana ireo fanomezana fito araka ny raisintsika rehefa mankalaza ny sakramentan'ny fankaherezana isika. Hanampy antsika amin'ny fanorenana ny EOY izany. Enga anie ny Fanahy Masina hanazava ny fiainantsika kokoa ka hitarika antsika amin'ny marina rehetra. Tsara asongadina amin'izao pantekôty izao tsy anatin'ny fitapitaka na lainga na kobaka ambava toy ny mahazatra antsika fa anatin'ny marina, mieritreritra fifidianana isika izao, mieritreritra fanorenana Eglizy velona isika, maniry firenena mandroso amin'ny lafiny rehetra isika, maniry firenena hisandratra mba hanana anjara masoandrony dia fantaro araka ny averimberin'ny eveka matetika fa tsy ny harena no tsy misy eto amintsika, manankarena i Madagasikara, tsy ny olomanga no tsy misy, manana olomanga fa mahantra olomarina ny firenentsika. Enga anie hanaiky ny Fanahy Masina isika sy hitari dâlana antsika amin'izay hahafantatra ny marina isika izay hitondra antsika amin'ny fanorenana marina tokoa.

Ry Kristianina Havana, tsara ho tsakotsakointsika ny vokatry ny asan'ny Fanahy Masina, ao amintsika tokoa ny Fanahy Masina ka navaoziny ny fontsika dia tsy inona fa ny fifankatiavana no miteraka hafaliana hoy Md Paoly ao amin'ny vakiteny faharoa, fifaliana maharitra sy lavorary no mitondra fiadanana. Vokatry ny ratsy kosa dia manambara fa tsy mivelona ao anatin'ny Fanahy Masina isika, tsy inona fa ny fijangajangana, ny fahalotoana, ny fijejojejoana izay mifanohitra amin'ny fampianaran'i Jesoa ka mitarika antsika manapotika ny fiainantsika, ny fiainan'ny fiaraha monintsika sy manapotika ny tontolo iainantsika. Ny fanompoantsampy ny fifandirana, ny fialonana, ny fahatezerana, ny ady isankarazany ny fitsotokotokoana, ny famonoan'olona, ny fifamonoana dia asan'izao tontolo izao, ny fanahin'izao tontolo izao no mitarika antsika amin'ireny ary fantantsika ny vokany : fanapotehana, fanilikilihana, ary famonoana. Ka raha taranaka mpanorina tokoa isika aoka handray ny Fanahy Masina, araky ny lazain'i Md Paoly : “ ireo izay manaraka ny hevitr'izao tontolo izao dia tsy handova ny fanjakann'ny lanitra”.

Raha tiantsika ny handova ny fanjakan'ny lanitra sy ho mpanorina marina ary hanorina Eglizy Velona aoka handrehitra ao ampontsika ny hafatr'i Md Paoly fa ny vokatry ny Fanahy Masina no hahafantarana fa mifankatia isika ary feno hafaliana. Raha feno hafaliana maharitra isika dia fiadanampo no ao amintsika na dia eo aza ny zavatra sarotra dia manana faharetana isika amin'ny fifandraisantsika amin'ny tontolo manodidina antsika. Feno hazavam-po sy fahiratam-panahy isika, mikolokolo sy manatsara fa tsy manaratsy. Isika tsy mivadika amin'ny marina dia vokatry ny asan'ny Fanahy Masina, ny fahalalana onona, ireo no toetra ao amin'i Jesoa ka tsy maintsy ho toetrantsika. Mitaky fahafoizana izany ka aoka isika hifantsika amin'ny hazo fijaliana miaraka amin'i Kristy ka ny vokatry ny fankalazantsika ny paka dia fiainam-baovao ao amin'i Kristy.

Ry Jesoa zokinay ô, misaotra anao izahay fa nomenao ny Fanahy Masina, nomenao ny Fanahinao ka izy no manentana ny fiainanay andavanandro ka tsy izahay intsony no velona fa lanao no velona ato aminay ka zary vavolombelonao izahay. Avoazy amin'ny Fanahinao isanandro izahay amin'izay dia hivondrona iray ho fianakaviana araiky aminao ka ho tonga ho génération de constructeur, de bâtisseur ary ho taranaka mpanorina ny Eglizy velona ka tsy hatahotra izahay fa hiroso amin'ny lalindalina hampirehitra aminay ilay fitiavana mirehidrehitra tao amin'ny apôstôly rehefa nidinan'ny Fanahy Masina izy ireo ka izany anie hahatonga anay ho tena vavolombelona tahaka an'i Olontsambatra Lucien Botovasoa sy Olontsambatra Victoire Rasoamanarivo. Mila vavolombelona ny andro iainanay ka aoka hirehidrehitra ao amponay tokoa ny fitiavanao mba ho mpanorina ny Eglizy Olona Velona. Amen

Mompera Arseveka Mgr Benjamin Ramaroson